

प्रमुख समाचार –

- 1— केन्द्र सरकार ह पश्चिम एशिया संघर्ष अउ एखर सेति दुनियाभर म कच्चा तेल के आपूर्ति म आय रूकावट के बीच तीस जून तक महत्वपूर्ण पेट्रोकेमिकल उत्पाद के सीमा सुल्क म छूट देहे।
- 2— छत्तीसगढ़ म चलत खेलो इंडिया ट्रायबल गेम्स के तहत महिला फुटबाल के फाइनल मुकाबला म आज छत्तीसगढ़ ह झारखंड ल हराके स्वर्ण पदक म कब्जा जमाइस।
- 3— रामअवतार जग्गी हत्या कांड म छत्तीसगढ़ उच्च न्यायालय ह सीबीआई के अपील मंजूर करीस— अमित जोगी ल तीन हफ्ता के अंदर सरेंडर करे के दिन आदेस।

पेट्रोकेमिकल—सीमा शुल्क

केन्द्र सरकार ह पश्चिम एशिया संघर्ष अउ एखर कारण दुनियाभर म कच्चा तेल के आपूर्ति म आय रूकावट के बीच तीस जून तक महत्वपूर्ण पेट्रोकेमिकल उत्पाद म सीमा सुल्क म छूट देहे। वित्त मंत्रालय ह कहे हे कि ए उपाय घरेलू उद्योग म जरूरी पेट्रोकेमिकल के उपलब्धता सुनिश्चित कराय बर अस्थाई रूप म ले गेहे। मंत्रालय ह केहे हे कि एखर ले संबंधित क्षेत्र म लागत के दबाव कम होही अउ आपूर्ति म स्थिरता आही। संघरा उपभोक्ता मन ल राहत मिलही। मंत्रालय ह केहे हे कि कुल चालीस वस्तु म सीमा सुल्क म छूट दे गेहे। एमा मेथनॉल, अमोनिया, टोल्यून, स्टाइरीन, डाइक्लोरोमेथेन अउ विनाइल क्लोराइड मोनोमर सामिल हे।

प्रधानमंत्री—सीसीएस बैठक

पश्चिम एशिया म जारी संघर्ष के बीच प्रधानमंत्री नरेन्द्र मोदी ह काली सुरक्षा संबंधी कैबिनेट समिति—सीसीएस के बइठका लीन। बइठका म प्रधानमंत्री ह पश्चिम एशिया संघर्ष के प्रभाव ल नागरिक मन ल बचाव बर हरसंभव प्रयास करे के निरदेस दीन। ओमन बतईन कि घरेलू उपभोक्ता मन बर एलपीजी के कीमत स्थिर बने हुए हे अउ एलपीजी के जमाखोरी अउ कालाबाजारी म अंकुश लगाय बर नियमित रूप ले अवैध उत्पादन विरोधी अभियान चलाय जात हे। प्रधानमंत्री ह काली आने—आने मंत्रालय अउ विभाग के कार्यक्रम के घलो समीक्षा करीन।

कर्मयोगी साधना सप्ताह

प्रधानमंत्री नरेन्द्र मोदी ह किहीन हे कि भारत के तेजी ले बदलत आकांक्षा बर एक अइसे प्रशासनिक मॉडल के जरूरत हे, जउन न केवल कुसल हो बल्कि नागरिक केन्द्रित हो। ओमन कर्मयोगी साधना सप्ताह ल संबोधित करत आज एक वीडियो संदेस म ए बात कहिन। वर्तमान सासन ल 'नागरिक देवो भव' के मंत्र ले निर्देशित बतावत श्री मोदी ह किहीन कि एखर स्पष्ट उद्देश्य सार्वजनिक सेवा ल अधिक सक्षम, संवेदनशील अउ नागरिक—केन्द्रित बनाना हे।

क्षमता निर्माण आयोग अपन स्थापना दिवस अउ मिशन कर्मयोगी के पांच साल पूरा होय के उपलक्ष्य म आज ले आठ अप्रैल तक कर्मयोगी साधना सप्ताह मनावत हे।

## जनगणना 2027

राष्ट्रपति द्रौपदी मुर्मु अउ उपराष्ट्रपति सीपी राधाकृष्णन ह जनगणना दू हजार सत्ताईस बर आज ऑनलाइन स्व-गणना प्रपत्र भरीन। ओमन देसवासी मन ल आधिकारिक वेब पोर्टल के माध्यम ले अपन परिवार के विवरण ऑनलाइन जमा करके स्व-गणना प्रक्रिया म सामिल होय बर प्रोत्साहित करीन।

उहें, प्रधानमंत्री नरेन्द्र मोदी ह घलो स्व-गणना पूरा कर लेहे, जउन बछर दू हजार सत्ताईस के जनगणना के पहिली चरण के सुरुआत के प्रतीक हे। ए चरण म घर-घर के सूची बनाना अउ आवास संबंधी काम सामिल हे। श्री मोदी ह किहीन कि ए जनगणना पहिली घांव डिजिटल माध्यम ले डेटा संग्रह करे बर करे जात हे। श्री मोदी ह देस के लोगन मन ले अपन परिवार के विवरण खुद भरे अउ जनगणना प्रक्रिया म भाग लेके अपील करीन।

## एसआईआर-अपीलीय न्यायाधिकरण

सर्वोच्च न्यायालय के निर्देश के अनुसार मतदाता सूची के विशेष गहन पुनरीक्षण-एसआईआर के अंतर्गत विचाराधीन सूची ले जउन मतदाता के नाम हटा दे गेहे, ओखर मामला के सुनवाई बर अपीलीय न्यायाधिकरण आज ले कार्यवाही सुरु करही। ऑनलाइन अउ ऑफलाइन दूनो माध्यम ले प्रस्तुत जम्मों आवेदन, दस्तावेज अउ जानकारी न्यायाधिकरण ल ओखर निर्णय बर उपलब्ध कराय जाही।

## कृषि मंत्री-बैठक

केन्द्रीय कृषि मंत्री शिवराज सिंह चौहान ह कहिन हे कि अब तक उन्नीस राज्य म नौ करोड़ पच्चीस लाख किसान पहिचान पत्र बनाय जा चुके हे। श्री चौहान ह काली आने-आने राज्य के कृषि मंत्री मन संग समीक्षा बइठका करीन। ए दउरान ओमन राज्य मन ल उर्वरक के जमाखोरी अउ कालाबाजारी के खिलाफ कड़ा कार्रवाई करे के निरदेस दीन। ओमन किहीन कि किसान मन ह उंखर उपज के उचित मूल्य मिलना चाही, उंखर सिकायत के समय म निवारण होना चाही अउ खरीद सीधा किसान मन ले करे जाने चाही। ओमन पीएम-आशा योजना के अंतर्गत दलहन अउ तिलहन के न्यूनतम समर्थन मूल्य म खरीद के समीक्षा घलो करीन।

## खेलो इंडियो ट्रायबल गेम्स

छत्तीसगढ़ म चलत खेलो इंडिया ट्रायबल गेम्स के नौवां दिन आज रईपुर म तीरंदाजी अउ फुटबाल अउ जगदलपुर म एथलेटिक्स के मुकाबला होवत हे।

महिला फुटबाल के फाइनल मुकाबला आज छत्तीसगढ़ अउ झारखंड के बीच खेले गीस, जेमा छत्तीसगढ़ के टीम ह झारखंड के टीम ल एक-सून्य ले हरा के स्वर्ण पदक म कब्जा जमा लेहे।

इही बीच, पुरुष फुटबाल के फाइनल मुकाबला काली तीन अप्रैल के छत्तीसगढ़ अउ पश्चिम बंगाल के बीच खेले जाही।

इंखर पहिली, काली रईपुर म होय महिला हॉकी के फाइनल मैच म ओडिसा ह मिजोरम ल सून्य के मुकाबला एक गोल ले हराके स्वर्ण पदक जीतिस। उहें, पुरुष हॉकी के फाइनल म ओडिसा ह झारखंड ल एक के मुकाबला चार गोल ले हराके स्वर्ण पदक म कब्जा जमाइस।

तीन अप्रैल तक चलइया खेलो इंडिया ट्रायबल गेम्स म तीस राज्य अउ केंद्रशासित प्रदेश के तीन हजार ले जादा खिलाड़ी हिस्सा लेवत हे। एखर तहत सात खेल-तीरंदाजी, एथलेटिक्स, फुटबॉल, हॉकी, तैराकी, वेटलिफ्टिंग अउ कुस्ती के स्पर्धा होवत हे। जबकि मनखंभ अउ कबड्डी ल डेमो खेल के रूप म सामिल करे गेहे।

## लोकभवन—एक भारत श्रेष्ठ भारत

एक भारत—श्रेष्ठ भारत के तहत लोकभवन म काली मिजोरम, अरुणाचल प्रदेश, बिहार, राजस्थान अउ ओडिसा के अलावा दादर—नागर हवेली अउ दमन—दीव राज्य के संघरा केन्द्रसासित प्रदेश मनके स्थापना दिवस मनाय गीस। ए मउका म राज्यपाल रमेन डेका अउ मुख्यमंत्री विष्णुदेव साय मौजूद रिहीन।

ए मउका म राज्यपाल ह किहीन कि ए अवसर राज्य मनके समृद्धि विरासत, ऐतिहासिक परंपरा अउ विकास यात्रा ल सुमरे के महत्वपूर्ण अवसर हे।

उहें, मुख्यमंत्री ह किहीन कि एक भारत—श्रेष्ठ भारत करोड़ों देसवासी मन ल आपस म जोड़त हे। समारोह म आने—आने विश्वविद्यालय के छात्र—छात्रा मन जम्मों राज्य के सांस्कृतिक कार्यक्रम के प्रस्तुति दीन।

## केन्द्रीय गृहमंत्री—सांसद मुलाकात

केन्द्रीय गृह अउ सहकारिता मंत्री अमित शाह ले आज नई दिल्ली म राजनांदगांव सांसद संतोष पांडेय ह भेंट करीन। ए दरान ओमन केन्द्रीय गृहमंत्री ले बस्तर म नक्सलमुक्त अभियान ल लेके चरचा करत बस्तर ल नक्सल मुक्त बनाय बर आभार जतईन। श्री पांडेय ह किहीन कि बस्तर म नक्सलवाद के समापन के बाद एक नवा बस्तर के उदय होय हे, जउन बस्तर ल वैश्विक पहिचान दिलाही।

## हनुमान जन्मोत्सव

हनुमान जन्मोत्सव आज छत्तीसगढ़ समेत देसभर म पारंपरिक श्रद्धा अउ उछाह के संग मनाय जात हे। ए मउका म देसभर के हनुमान मंदिर मन म आज बिहनिया ले विशेष पूजा—अर्चना के संग अनुष्ठान अउ भंडारा के आयोजन करे जात हे।

हनुमान जन्मोत्सव के मउका म आज राजधानी रईपुर समेत प्रदेश के जम्मों हनुमान मंदिर मन म श्रद्धालु मनके लंबा लाइन देखे जात हे। उहें, आने—आने जघा म सुंदरकांड, हनुमान चालीसा अउ अखंड रामायण पाठ समेत दूसर धार्मिक आयोजन करे जात हे। ए मउका म कई जगह म सोभा यात्रा घलो निकाले गीस।

## जग्गी हत्याकांड—अमित जोगी

छत्तीसगढ़ उच्च न्यायालय ह राष्ट्रीय कांग्रेस पार्टी के तत्कालीन कोषाध्यक्ष रामअवतार जग्गी के हत्या के मामला म सीबीआई के अपील ल मंजूर कर लेहे। एखरे संग कोर्ट ह अमित जोगी ल तीन हफता के अंदर सरेंडर करे के आदेस देहे।

बतादन कि रामअवतार जग्गी के बेटा सतीस जग्गी ह याचिका दायर करके उच्च न्यायालय के फइसला ल सर्वोच्च न्यायालय म चुनौती दे रिहीस। याचिका के सुनवाई के दरान सुप्रीम कोर्ट ह मामला के सुनवाई बर छत्तीसगढ़ उच्च न्यायालय ल निरदेस देहे।

## बुलेटिन शुभारंभ

आकाशवाणी केंद्र रईपुर के प्रादेशिक समाचार एकांश कोति ले अवइया पांच अप्रैल ले पांच—पांच मिनट के दू अतिरिक्त प्रादेशिक समाचार बुलेटिन के प्रसारण करे जाही। ए समाचार बुलेटिन बिहनिया नौ बज के पचपन मिनट ले दस बजे तक अउ ग्यारा बजके पचपन मिनट ले बारह बजे तक प्रसारित होही। एखर प्रसारण छत्तीसगढ़ स्थित आकाशवाणी के जम्मों केंद्र कोति ले करे जाही।

